



Idrettslaget Søya

6640 KVANNE

Idrettslaget Søya - Løyve til preparering av skiløype med tråkkemaskin i Prestgardselva naturreservat i Surnadal kommune

Idrettslaget Søya søker om løyve til å preparere skiløype i Prestgardselva naturreservat. Preparering av skiløype med tråkkemaskin, så langt det er teile bakken og tilstrekkeleg med snø i området, synast å vere skånsamt mot vegetasjon og marka under. Fylkesmannen vurderer ikkje prepareringa til å vere i strid med verneformålet eller at det vil påverke verneverdiane nemneverdig.

Fylkesmannen gjev difor løyve til preparering med tråkkemaskin av skiløypa på visse vilkår. Vilkåra er lista opp under vedtaket i slutten av brevet.

Bakgrunn

Fylkesmannen viser til søknad datert 07.09.2015, samt tilleggssøknad datert 09.11.2015 frå Idrettslaget Søya v/Tore Gjøl.

IL Søya søker om å få utvide eksisterande skutertrasé til tråkkemaskintrasé mellom Vang skiarena og retning Strengen. I følgje IL Søya har eksisterande trasé vore oppkjørt dei siste 20-25 åra. Deler av traseen går gjennom Prestgardselva naturreservat. På grunn av eit bratt parti i noverande trasé vil det verte nødvendig å legge om traseen litt i dette området. I tillegg ønsker IL Søya å kjøre opp ein ny trasé, noko som vil lette oppkjøringa av løypenettet og gje om lag ein km mindre kjøring i verneområdet. Det er etablert tre bruer som blir brukt i forbindelse med skutertraseen, og det vil verte nødvendig å utvide desse slik at alle får ei breidde på fem meter. Alternativt ønsker dei å legge stikkrenner der det i dag er bruer. Det vil og verte nødvendig å flytte bru ein (sjå vedlagt kart) nokre meter. I enkelte parti av traseen vil det verte nødvendig å fjerne noko skog. Fururabben ved Haukarberget er ein mykje brukt rasteplass like ved skiløypa. IL Søya ønsker å sette opp ei infotavle og ein benk her. Det opplystast om at all frakt av materialar og all maskinell preparering vil skje på frosen og snødekt mark.

Det har blitt utført noko skogrydding i omsøkt trasé allereie, jamfør telefonsamtale med Tore Gjøl den 19.10.2015.

Fylkesmannen har ikkje tidlegare mottatt søknad om dispensasjon frå verneforskrifta.

Fylkesmannen si vurdering

Postadresse:	Telefon:	E-post:	Web:	Org.nr:
Postboks 2520 6404 Molde	71 25 84 00	fmmrpostmottak@fylkesmannen.no	www.fylkesmannen.no/mr	974 764 067

Søknaden er behandla etter forskrift om freding av Prestgardselva naturreservat og naturmangfaldlova. Prestgardselva blei freda som naturreservat den 13.12.1996. Formålet med fredinga er å ta vare på eit svært rikt og fint utvikla bakkemyrlandskap med verdi som nasjonalt typeområde.

I følgje verneforskrifta for naturreservatet er motorisert ferdsel forbode, jamfør § 4 pkt. 3. Det kan gis dispensasjon til motorisert ferdsel på snødekt frosen mark, jamfør § 5 pkt. 6. I naturreservatet er all vegetasjon, inkludert døde buskar og tre, freda mot ei kvar form for skade og øydelegging, jamfør § 4 pkt. 1. Det må ikkje bli satt i verk tiltak som kan endre dei naturgjevne tilhøva, som til dømes oppføring av bygningar, anlegg og faste innretingar, jamfør § 4 pkt. 2.

Forvaltingsstyremakta kan i medhald av § 6 gje dispensasjon frå § 4 pkt. 1 for uttak og planting av skog på fastmark. For alle bonitetar frå og med F11 eller betre, kan det gjevast dispensasjon frå § 4, punkt 1 i verneforskrifta, jamfør brev frå Fylkesmannen datert 12.08.1998 (ref. 1997/00027/432.41/HØ/SUH). Det er altså ikkje heimel i verneforskrifta til å fjerne trevirke frå areal med bonitet som er dårlegare enn F11, og ein slik dispensasjon må såleis behandlast etter den generelle dispensasjonsheimelen, § 48 i naturmangfaldlova.

Etablering av bruer og benk må også behandlast etter § 48 i naturmangfaldlova. Fylkesmannen skal legge naturmangfaldlovas miljørettslege prinsipp (§§8-12), jamfør § 7, til grunn i vurderinga, og skal vise korleis desse er tillagt vekt.

§ 8 – Kunnskapsgrunnlaget

Kunnskapsgrunnlaget er henta frå søknad, tidlegare forvaltningspraksis, synfaring av området og søk i naturbase og artskart. Heile reservatet er registrert som rikmyr med A-verdi i naturbase. Det er ikkje blitt gjort biologiske registreringar som har funne raudlisteartar i reservatet, jamfør søk i artskart 18.12.2015.

Fylkesmannen vurderer at det er tilstrekkeleg kunnskap til å fatte eit vedtak i saka, og det er difor ikkje nødvendig å vektlegge § 9 «Føre-var-prinsippet».

§ 10 – Økosystemtilnærming og samla belastning

Naturreservatet er ei tidlegare slåttemyr og det er fleire gamle høyløer i området. Det ligg fleire hytter i området.

Det er allment kjent kunnskap at motorferdsel kan virke forstyrrande på dyreliv, og gje skade på vegetasjon om den føregjeng på barmark. I tillegg kan både spor og støy frå motorferdsel virke forstyrrande på friluftsliv. Spesielt viktig er det at all preparering av skiløype ved bruk av tråkkemaskin i myrområder skjer på bakke som er botnfrosen og med tilstrekkeleg snø. Under slike høve vurderer fylkesmannen at tiltaket ikkje vil føre til vesentleg skade eller belastning på verneverdiane.

Det er allereie etablert fleire bruer i skiløypetraseen, fylkesmannen meiner at ei oppgradering av desse ikkje vil føre til vesentleg tap av verneverdiane såframt det ikkje blir gjort nye fysiske inngrep i marka, og at all transport av materialar skjer på frosen snødekt mark. Etablering av stikkrenner ser fylkesmannen på som ei dårlegare løysing, da det vil føre til større fysiske inngrep.

Fylkesmannen synfarte traseen den 06.11.2015. Det trengs ikkje gjerast fysiske inngrep i marka i forbindelse med tiltaket, men det vil verte nødvendig å fjerne nokre tre for å få tilstrekkeleg brei trasé. I den foreslegne nye traseen vil det verte behov for rydde noko yngre bjørkeskog. Området er i dag i ferd med å gro igjen og fylkesmannen vurderer at å fjerne nokre av desse trea, såframt det blir gjort på ein skånsam måte, vil vere med på å kunne fremje verneverdiane.

Idrettslaget Søya ønsker å sette opp ei informasjonstavle og ein benk ved Haukarberget. Reservatet har i dag ingen informasjonstavle, og det er ønskeleg også frå fylkesmannen si side at det blir satt opp ei. Fylkesmannen vil utarbeide ei slik informasjonstavle i henhold til vår mal. Såframt benken blir frakta opp på frosen snødekt mark vil ikkje benken, slik vi vurderer det, føre til negative konsekvensar for verneverdiane.

Fylkesmannen meiner at tilrettelegging for skigåing i naturreservatet i foreslegne løypetraséar kan gjennomførast utan at slitasjen på området blir vesentleg høgare, eller at verneverdiane blir skadelidande. Vi vil difor leggje lite vekt på prinsippet om samla belastning i behandlinga av søknaden, jamfør naturmangfaldlova § 10.

§ 11 – Kostnaden ved miljøforringing skal berast av tiltakshavar

Om tiltaket skulle medføre ei forringing av miljøet skal kostnadane med retting og/eller tilbakeføring bærast av tiltakshavar.

§ 12 – Miljøforsvarlege teknikkar og driftsmetodar

Naturmangfaldlova § 12 tilseier at eventuelle tiltak skal utførast slik at ein unngår eller minimerer skadevirkningar på naturmangfaldet. Så lenge oppkjøring av traseen skjer på frosen mark med godt snødekke vil det ikkje bli vesentleg skade på vegetasjonen. Vi meiner tiltaket ikkje er i strid med § 12 i naturmangfaldlova.

Fylkesmannen sin konklusjon

Idrettslaget Søya søker om løyve til å preparere skiløype i Prestgardselva naturreservat. Preparering av skiløype med tråkkemaskin, så framt det er tele i bakken og tilstrekkeleg med snø i området, synast å vere skånsamt mot vegetasjon og marka under. Fylkesmannen vurderer ikkje prepareringa til å vere i strid med verneformålet eller at det vil påverke verneverdiane nemneverdig. Fylkesmannen gjev difor løyve til preparering med tråkkemaskin av skiløypa på visse vilkår.

Vedtak

Fylkesmannen i Møre og Romsdal gjev Idrettslaget Søya løyve til å preparere skiløypa mellom Vang skiarena og retning Strengen i Prestgardselva naturreservat.

Løyyvet er gitt med heimmel i forskrift av 13.12.1996 om vern av Prestgardselva naturreservat, § 5 pkt. 6 og § 6, samt § 48 i naturmangfaldlova.

Følgande vilkår gjeld:

- All preparering skal skje på frosen og godt snødekt mark, og den skal skje omsynsfullt slik at det ikkje lagast varige spor i terrenget.
- Løypetraseane skal vere i tråd med vedlagte kart.
- All transport av materiale til bruer og benken skal skje på frosen og snødekt mark.
- Løyyvet er gyldig i 5 år, til 04.01.2021.

Heilt nødvendig fjerning av busk, kratt og trær i mindre omfang, også langs ny trasé er her inkludert.

Dersom det viser seg at kjøring etter dette løyvet skadar verneverdiane vil vi trekke tilbake eller endre løyvet.

Vi gjer merksam på at dette løyvet berre gjeld i forhold til verneforskrifta. Det må innhentas eige løyve frå grunneigarar og frå kommune.

Klageadgang

Vedtaket kan klagast på av alle partar i saka eller andre med rettsleg klageinteresse, jamfør forvaltningslova kap. VI. Klagefristen er tre veker og ei eventuell klage skal stilast til Fylkesmannen. Det er Miljødirektoratet som er klageinstans.

Med helsing

Ulf Lucasen
ass. direktør

Solveig Silset Berg

Dokumentet er elektronisk godkjent og har ingen signatur.

vedlegg:

- 1 Kart over løypetrasé

kopi:

Lars Olav Lund
Surnadal kommune Bårdshaugvegen 1 6650 SURNADAL